

Nowodhow an Seythen

13/10/08

Konsel Kernow re gollas pymp milvil peuns yn arhanti rewdir.

Fyllel a wrug Landisbanki y'n seythen yw passys yn mysk kudynnow mona a-hys an bys.

An konsel a lever bos etek ugens milvil peuns gorrays yn akontow erel.

Konsel Rostormol a lever i dhe gelli peswar milvil peuns y'n keth arhanti.

**

An Trest Kenedhlek a lever bos godros meur dhe Gernow awos nivel an mor owt yn kressya.

An trest re dhellos derivas nowyth, henwys: Arvorow ow Kwaya... hag ynno yma kedhlow a'n tyleryow yn-dann wodros a-der-dro dhe Gernow.

Yma y'ga mysk, An Garrek Loos y'n Koos... le mayth eus ober rag may hallo bos possybyl kerdhes a-hys an kons ynter an enys ha Marhas Yow rag lies bledhen voy.

**

Hwel Geevor re ygoras kresen dornysi nowyth gans lies tra bella rag vysitoryon.

Kost an gresen o tri poynt eth milvil peuns.

Yma yn mysk an diskwedhyansow... stop rag diskwedhes fatel veu moon gwaynyes y'n bal.

**

Yma degves pennbloodh warn ugens Lowender Peran an seythen ma.

Yma an hwarvos synsys warlergh usadow orth Ostel Ponsmeur yn Porth Peran.

Yth esa own bos an hwarvos an diwettha y'n ostel na hevlena.

Byttagyns, gwerth an ostel a wrug fyllel... ytho y fydh an gool synsys ena rag nebes moy bledhynnyow hwath dhe dhos.

Yma Merv Davey yn mysk an ordenoryon...

<clip>

**

Rygb...

An Para Oll-Du a fethas Stourbridge an bennseythen yw passyes orth Pons Polson. An diwettha skor o seytek warn ugens dhe naw warn ugens.

Bay an Menydh a gollas arta ...an prys ma erbyn Blaydon. Ny wrug an Gernowyon gwaynya saw seyth poynt erbyn dew ugens.

Rysrudh a waynyas arta... wosa fetha Black Heath deg poynt warn ugens dhe bymthek.
Lemmyn, yma an Rudhyon orth gwartha an rol.
Ha'n Vorladron veu fethys rag an tressa seythen warbarth.
I eth dhe goll erbyn Kewri Rotherham orth Kambron... eth poynt warn ugens dhe
dhewdhek warn ugens.

**

Nessa seythen y fydh dyllans Radyo an Gernewegva arbennik wosa Lowender Peran.
Y fedhav ena ow rekordya an dowlenn... gans sonyow, levow hag ilow.
Agas gweles omma keffrys der Nowodhow an Seythen.